

मार्निंग डोगरी न्यूज़ बुलेटिन, समें. 09.20 Hrs

<><><><><><>

एह आकाशवाणी जम्मू ऐ, बडलै खबरें च तुंदा सुआगत, पैहले खास-खास खबरें कन्नै जगमोहन शर्मा।

Headlines

- 1- प्रधानमंत्री नरेंद्र मोदी होर अज्ज पी.एम किसान स्कीम दी 17मीं किश्त जारी करंगन।
- 2- सड़क ट्रांसपोर्ट ते जरनैली सड़कें सरबंधी केंद्री मंत्री नितिन गडकरी होरें श्रीनगर च इक उच्ची तह दी बैठक सददिए जम्मू-कश्मीर च जारी महत्वपूर्ण सड़क ते जरनैली सड़क परियोजनाएं दा जायजा लैता।
- 3- नितिन गडकरी होरें आखेआ ऐ जे भारतीय राष्ट्रीय जरनैली सड़क प्राधिकरण NHAI जम्मू-कश्मीर च 4 ज्हार करोड़ रपे दी लागत आली छतरगला सुरंग दा कम्म बड़ी तौले शुरू करी देग।
- 4 त्रौनें सेनाएं दे प्रमुख सीडीएस जनरल अनिल चौहान होरें जम्मू दा दौरा लाइए प्रांतै च पूरे-पराते सुरक्षा हालात ते फौज दिएं तैयारिएं दी समीक्षा कीती।

<><><><><><>

PM-Kissan

प्रधानमंत्री नरेंद्र मोदी होर अज्ज वाराणसी च पी.एम किसान योजना दी 17मीं किश्त गी जारी करंगन। कोई 9 करोड़ 26 ज्हार करसानें गी कोई 20 ज्हार करोड़ रपे शा मते दा लाह बैंक खातें

च मुंतकिल करंगन। प्रधानमंत्री होर कोई 30 जहार कोला मते आप मदादी समूहें गी कृषि सखिएं दे तौरा पर दिती गेदी सिखलाई आहलें गी सर्टिफिकेटां बी बंडडन। ताले गेदे 50 कृषि विकास केंद्रें उप्पर विशेष कारजक्रम आयोजित कीता जा रदा ऐ। पीएम किसान योजना 24 फरवरी 2019 गी जिमी आले सब्बै करसानें दी माली जरूरतै गी मदद करने गितै शुरू कीती गई ही। सलाना 6 जहार रपे दी माली मदाद बरोबर त्रै किशतें च हर 4 म्हीने दे बाद करसानें दे बैंक खातें च सिद्धे मुंतकिल कीता जंदा ऐ। अज्जै तोड़ी समूलचे राष्ट्र च 11 करोड़ कोला मते करसानें गी 304 लक्ख करोड़ रपे दिते जाई चुके दे न। योजना दे शुरू होने कोला कुल मुंतकिल 324 लक्ख करोड़ रपे लाभार्थियें गी दिते जाई चुके दे न।

<><><><><><>

J&K Review Meeting

सड़क, ट्रांसपोर्ट ते जरनैली शिड़कें सरबंधी केंद्री मंत्री नितिन गडकरी होरें जम्मू-कश्मर सड़क ते जरनैली सड़क परियोजनाएं दी प्रगति दा जायजा लैने लेई कल राजभवन श्रीनगर च इक उच्ची सतह दी बैठक दी अध्यक्षता कीती। इस मौके उपराज्यपाल मनोज सिन्हा होरें प्रधानमंत्री नरेंद्र मोदी ते निति गडकरी हुंदा जम्मू-कश्मीर लेई बड़डियां ते महत्वपूर्ण ढांचागत परियोजनां देने लेई आभार प्रगट कीता। उनें आखेआ जे अस्स जम्मू-कश्मीर दे निग्गर ते शानदार भविक्ख लेई पूरी निष्ठा ते तनदेही कन्नै कम्म करै करने आं। एल.जी होरें राष्ट्रीय जरनैली शिड़क प्राधिकरण एनएचएआई ते संपर्क तैहत बक्ख-बक्ख परियोजनाएं दे बारे च बी चर्चा कीती जिंदे च रिंग रोड जम्मू, जेड मोड़ सुरंग, उधमपुर-रामबन सड़कें गी चैड़ा करियै चउं लैने आला बनाने, खलैनी किशतवाड़ छातरू ते चनैनी सुद्धमहादेव सड़कें दा कम्म शामिल ऐ।

<><><><><><>

Nitin Gadkari

शिड़क यातायात ते जरनैली शिड़कें दे केंद्री मंत्री नितिन गडकरी होरें आखेआ ऐ जे भारती राश्ट्रीय जरनैल शिड़क प्राधिकरण जम्मू-कश्मीर च 4000 करोड़ रपे दी लागत कन्नै बनने आली Chattergala Tunnel पर तौलें गै कम्म शुरू करोग। बैठक दौरान केंद्री मंत्री डॉ. जितेंद्र सिंह होरें आखेआ जे इस सुरंग लेई 6 बरे पैहले प्रस्ताव दिता गेआ हा ते सीमा सड़क संगठन आस्सेआ इक तफसीली रिपोर्ट बी तैयार कीती गई ही पर फंडें दी कमी कारण एहदे पर कम्म शुरू नेई कीता जाई सकेया। हून एह तय कीता गेआ ऐ जे एनएचएआई इस नमीं राश्ट्रीय जरनैली शिड़क दा निर्माण करोग जेड़ी लखनपुर थमां बसोहली, बनी ते फही भद्रवाह-डोडा तगर जाग। उनें आखेआ जे इस जरनैली शिड़कें दे निर्माण कम्म पूरा होने परेंत लखनपुर थमां डोडा तोड़ी राबते च सखाल होग ते यात्रा करने दे समां बी घट्ट होग। एहदे कन्नै गै बपार ते कम्म रोजगार दे मौके च बी मता बाद्दा दिक्खेआ जाग।

<><><><><><>

Secretary-Health

सेहत ते मेडिकल शिक्षा दे सचिव डॉ. सैयद अबिद रशीद शाह हुंदे निर्देशें मुजब कश्मीर च सेहत सेवाएं दे निदेशक डॉ. मुश्ताक ए राथर होरें श्री अमरनाथ जी दी जातरा दे पहलगाम आलेरस्ते दा दौरा लाया ते तैयारियें दा जायजा लैता। दौरें दौरान निदेशक होरें सेहत कर्मियें कन्नै गल्लबात कीती ते उनेंगी हर स्थिति च तनदेई कन्नै ते पूरी निष्ठा कन्नै अपना कम्म करने लेई प्रेरित कीता। इस दौरान उनें पहलगाम बेस कैंप अस्पताल Fristan, Chandanwari ते

पिस्सू टाप च जारी कम्मं दी प्रगति दा जायजा लैता। उनें सब्बनें मुतलका धइं गी समेसिर कम्मं गी सबूरा करने दे निर्देश दिते ते जारी कम्मं दी प्रगति पर संदोख प्रगट कीता। निदेशक होरें औंदी यात्रा दौरान बिजन कुसै परेशानी दे सेहत सहूलतां उपलब्ध करोआने ते सेहतकर्मियें लेई जेहड़े उत्थें तैनात न, उंदे लेई रौहने लेई आरामदायक आवास ते बाकी जरूरी साज-समेयान उपलब्ध करोआना यकीनी बनाने उप्पर जोर पाया।

<><><><><><>

DC Reasi

रियासी जिले च बनाए गेदे दुनिया दे सब्बनें शा उच्चे रेल पुल पर रेल इंजन दी कामयाब अजमैश दे इक रोज बाद जिला विकास कमिशनर विशेष महाजन ते जिला ते रेल प्रशासन दे होर केई अधिकारिएं कौड़ी बक्कल गां दा दौरा लाया ते उत्थे रेल लाइन पर जारी कम्मं दी रफ्तार ते प्रगति दा जायजा लैता। इस मौके उनेंगी दस्सेया गेआ जे इस रेल लाइन पर लगभग सारा गै कम्म मुकम्मल होई चुके दा ऐ। आकाशवाणी कन्नें गल्ल करदे होई उनें आखेआ।

.....बाईट.....

<><><><><><>

CDS-Anil Chouhan

जम्मू प्रांतै च सुरक्षा हालात ते कारवाइएं सरबंधी तैयारिएं दा जायजा लैने लेई त्रोंनें सेनाएं दे प्रमुख सीडीएस अनिल चौहान होर कल इक दिनै दे दौरै पर जम्मू आए दे हे। जनरल चौहान हुंदा एह दौरा केंद्री गृह मंत्री अमित शाह हुंदे आस्सेआ इक उच्ची सतह दी मीटिंग लाइए जम्मू-कश्मीर च सुरक्षा हालात ते अमरनाथें दी यात्रा गितै तैयारिएं दा जायजा लैने दे बाद लग्गी ऐ।

सीडीएस होर नगरोटा स्थित 16 कोर दे मुख्यालय पुज्जे जित्थे उनें इक बैठक दौरान जम्मू प्रांतें च पूरे पराते सुरक्षा हालात दी समीक्षा कीती। फौज दे आला अफसरें जिंदे च उत्तरी कमान अध्यक्ष बी शामिल हे, नै उनेंगी फौज दी तैनाती, कारवाइएं सरबन्धी तैयारिएं बगैरा बारै उनेंगी तफसीली जानकारी दिती। जम्मू प्रांतें च पिछले किश समें थमां आतंकी घटनाएं गी दिखदे होई बक्ख-बक्ख सतहें पर सुरक्षा तैयारिएं ते आतंकवाद कन्नै निब्बड़ने दिएं योजनाएं गी मुकदा रूप दिता जा रदा ऐ।

<><><><><><>

Encounter

उत्तरा कश्मीर दे बांडीपोरा जिले दी अरागाम इलाके च सुरक्षा बलें कल इक आतंकवादी गी टाकरे च ढेर करी दिता। पुलस अधिकारियें मुजब इलाके च आतंकवादिएं दे मौजूद हेने दी पक्की सूह थहोने मगरा सेना, सीआरपीएफ ते जम्मू-कश्मीर पुलस दी इक सांझी टीम नै इलाके गी घेरिये तुपाई अभियान शुरू कीता। सांझी टीमें दे संदिग्ध थाहर पुज्जने पर आतंकवादिएं गोलीबारी शुरू करी दिती जेदे कन्नै टाकरा भखी पेआ। खीरी खबरां थहोने तगर टाकरा जारी हा ते होर ब्यौरे गी अजें बलगेआ जा रदा ऐ। इक होर कारवाइ च कुपवाड़ा जिले दे हंदवाड़ा इलाके च इक हिज्बुल मुजाहिदीन आतंकवादी गी गिरफ्तार कीता गेआ। दस्सेया जा रदा ऐ जे उसी इलाके च किश खास लोकें गी चुनिये उंदी हत्या करने लेई आखेआ गेआ हा। ओदे कब्जे थमां इक चीनी पिस्तौल ते इक हत्थगोला बी बरामद कीता गेआ ते अगली तफतीश अजें जारी ऐ।

<><><><><><>

Swankha-Dangal

साम्बा जिले दे स्वांखा ग्रां च चलै करदे सिद्ध गोरिया नाथ हुंदे 7 रोजा सलाना मेले च कल सिद्ध स्वांखा केसरी दंगल दा सरिस्ता कीता गेआ जेदे च जम्मू-कश्मीर दे अलारवा होरनें राज्यें थमां आए दे पलोआनें हिस्सा लैता। इस बारे होर मती जानकारी कन्ने स्हाड़े जिला संवाददाता।

<><><><><><>

Heat-Wave

जम्मू-कश्मीर दे मदानी इलाके सने लगभग पूरे उत्तर भारत च गर्मी दी लैहर जारी ऐ ते अज्ज बी मौसम विभाग नै जबरदस्त गर्मी पौने दे आसार दस्से न। जम्मू-कश्मीर दे पदरे इलाके सने उत्तर प्रदेश, पंजाब, हरियाणा, चंडीगढ़, दिल्ली, हिमाचल प्रदेश, बिहार, उत्तराखंड ते झारखंड च बी तापमान औसतन 45 डिग्री दे कोलकाल चलै करदा ऐ। जम्मू च कल्लै दा बद्दोबद्द तापमान 44 इशारिया 3 ते घटोघट्ट तापमान 28 इशारिया 8 डिग्री सैल्यिस रिकार्ड कीता गेआ।

<><><><><><>